



Téama: Daonáireamh 2016

Cuspóirí

Go gcuirfear ar chumas an pháiste:

- ‘sonraí’ a thuiscint agus samplaí de shonraí sa scoil/rang a thabhairt
- scéal an Daonáirimh a léamh agus a phlé
- tuiscint céard é an daonáireamh agus príomhcheisteanna daonáirimh a fhreagairt
- cur síos a dhéanamh ar na céimeanna a bhaineann le daonáireamh a chur i gcrích
- cuid den eolas a bhailítear a liostáil
- na bealaí gur féidir sonraí daonáirimh a úsáid a phlé

Modheolaíochtaí

- ✓ Réiteach Fadhbanna
- ✓ Foghlaim i gcomhar lena chéile
- ✓ Úsáid a bhaint as an Timpeallacht
- ✓ Foghlaim ghníomhach
- ✓ Scileanna tríd Toilleadh
- ✓ Caint agus Díospóireacht

Scileanna Matamaiticiúla

- ✓ Cuir i bhfeidhm agus Réiteach Fadhbanna
- ✓ Cumarsáid a dhéanamh agus Léiriú
- ✓ Comhtháthú agus Ceangail
- ✓ Réasúnú
- ✓ Cuir i ngníomh
- ✓ Tuiscint agus Athchluimhniú

Tascanna

- Caint agus díospóireacht – seisiún tobsmaointe - ECF
- Imeacht don rang ar fad – Scéal an Daonáirimh / Ceisteanna agus Freagraí
- Obair Bheirte/Ghrúpa – Cártaí Ceiste agus Freagraí Daonáirimh
- Anailís a dhéanamh ar sonraí
- Seisiún díospóireachta – déan plé agus soiléiriú ar na céimeanna sa phróiseas daonáirimh / Daithí Daonáirimh sa Suíochán Te

Teastaíonn

- Acmhainn 1.1 Teimpléad ECF
- Acmhainn 1.2 Cárta Príomhcheisteanna
- Acmhainn 1.3 Scéal - ‘Daithí agus Daonáireamh 2016’
- Acmhainn 1.4 Teimpléid do Chártaí Ceisteanna Daonáirimh
- Acmhainn 1.5 Ceisteanna Daonáirimh agus Cártaí Freagraí
- Acmhainn 1.6 Daithí Daonáirimh
- Acmhainn 1.7 Daonáireamh 2011 – Céard is cuimhin leat?
- Acmhainn 1.8 Ceisteanna Daonáirimh – Teimpléad don Seisiún tobsmaointe

Príomhtheachtairéachtaí

- Áireamh oifigiúil é an daonáireamh de dhaonra na tíre.
- Tógann Éire daonáireamh oifigiúil uair amháin gach cúig nó deich mbliana.
- Glacann gach teaghlach sa tír páirt.
- Baintear úsáid as an eolas le todhchaí níos fearr a phleanáil.
- Cuireann an POS an daonáireamh i gcrích don rialtas.

Comhtháthú agus Nascáil:

Gaeilge: Teanga Labhartha: Caint agus díospóireacht, ceisteanna a chur, ceisteanna a fhreagairt, réasúnú, cuir síos, míniú, comparáid a dhéanamh....

Drámaíocht: Suíochán Te do Dhaithí Daonáirimh agus cinneadh a dhéanamh cé na freagraí a bheadh aige ar cheisteanna na bpáistí

Forbairt Teanga: *Daonáireamh, comhaireamh oifigiúil, sonraí, eolas, rialtas, An Phríomh-Oifig Staidrimh, áiritheoir, cláraigh, teaghlach, bailigh, ceist, foirm, iarr, Dé Domhnaigh, Aibreán, daonra, taifead, plean, todhchaí, seiceáil, comhaireamh, tábhachtach, cinneadh*

Measúnú

Beidh na páistí in ann

- liostáil ós ard na sonraí a bhailítear sa scoil/rang
- na ceisteanna maidir leis an scéal ‘Daithí agus Daonáireamh 2016’ a léamh, a phlé agus a fhreagairt
- ceisteanna tábhachtacha a chur ar Dhaithí Daonáirimh le tuilleadh a fhoghlaim maidir leis an daonáireamh
- ceisteanna tábhachtacha maidir leis an daonáireamh a fhreagairt
- cur síos a dhéanamh ar phróiseas an daonáirimh do dhaoine eile
- páirt a ghlacadh sa seisiún suíocháin te ina labhraíonn ‘Daithí Daonáirimh’ maidir le próiseas an daonáirimh

Pointí Airde don Mhúinteoir

Déan nóta i leabhar nótaí d’aon eachtraí tábhachtacha a thugann tú faoi deara, mar shampla páiste a bhfuil deacracht aige/aici na ceisteanna tábhachtacha a chur agus a fhreagairt. Tabhair faoi deara aon pháistí nach dtuigeann na smaointe agus an coincheap taobh thiar den daonáireamh. Smaoinigh orthu siúd a dteastaíonn dúshlán níos mó uathu agus bain úsáid as na moltaí tugtha san obair bhreise.

Obair Bhreise

Cruthaigh cur i láthair simplí ar na ceisteanna tábhachtacha daonáirimh ar chairt, i leabhar gearrthóg nó ag baint úsáide as bogábhair ríomhaireachta.

Tabhair cuairt ar www.censusatschool.ie agus comhlánaigh an ceistiúchán ‘Daonáireamh ar Scoil’ ar líne agus bí mar chuid de shonraí na suirbhéireachta. Cuardaigh staitisticí ar www.cso.ie/census.

Naisc Bhaile / Scoile

Déan plé ar Dhaonáireamh 2016 sa bhaile agus iarr ar bhaill an teaghlaigh smaoinemh siar ar an méid is cuimhin leo ó Dhaonáireamh 2011 [Acmhainn 1.7].

Tabhair cuairt ar www.census.ie le tuilleadh a fhoghlaim faoi Dhaonáireamh 2016.

Plé na ceisteanna a bhfuil súil agat feiceáil ar fhoirm an Daonáirimh [Acmhainn 1.8].

Nótaí an Mhúinteora - Ceacht a 1

Réamhrá

Plé agus Díospóireacht



Iarr ar na páistí smaoineamh faoin eolas a bhailíonn an múinteoir ranga, an príomhoide, an rúnaí sa seomra ranga... Taifead na samplaí a sholáthraíonn na páistí ar smeach chairt, mar shampla

Ainmneacha na bpáistí ag gach leibhéal ranga
Liosta na mbuachaillí i ngach rang
Liosta na gcailíní i ngach rang
Liosta na ndátaí breithe
Liosta seoltaí baile
Ainmneacha tuismitheoirí/caomhnóirí
Sonraí teagmhála, mar shampla uimhreacha gutháin
Teanga a labhraíonn siad
Creideamh
Torthaí scrúduithe na bpáistí
Scoileanna a d'fhreastail na páistí orthu
Líon deartháireacha / deirfiúracha
Aoiseanna deartháireacha / deirfiúracha



- Mínigh do na páistí go dtugtar 'sonraí' freisin ar an gcineál seo eolais. Iarr ar na páistí smaoineamh ar gach moladh ceann i ndiaidh a chéile agus míniú a thabhairt cén fáth go bhfuil an píosa eolais seo bailithe agus cén úsáid go bhféadfaí a bhaint as, mar shampla
 - ✓ Ainmneacha páistí: Do na taifid tinrimh, liostaí ranga a úsáid mar liostaí seiceála ...
 - ✓ Dátaí breithe: Le haois na bpáistí a chruthú, le páistí a chur chuig an leibhéal ranga ceart ...
 - ✓ Seoladh baile: Litreacha agus comhfhreagras a sheoladh ar aghaidh
 - ✓ Sonraí teagmhála: Teagmháil a dhéanamh i gcás práinne le tuismitheoirí, le cruinnithe a eagrú le tuismitheoirí...
 - ✓ Teangacha a labhraíonn na páistí: Múinteoirí agus acmhainní a chur ar fáil do pháistí a labhraíonn teanga seachas Gaeilge nó Béarla mar chéad teanga
- Taispeáin an leabhar rolla do na páistí agus mínigh go mbíonn sé ar thaifead sa leabhar seo nuair a bhíonn / nach mbíonn páiste ar scoil. Iarr ar na páistí cén t-eolas/sonraí a chuirtear isteach sa leabhar - ainm an pháiste, dáta breithe, seoladh, uimhir aitheantais nó clárucháin, freastal ...
- Faigh amach ó na páistí cén úsáid gur féidir a bhaint as na sonraí seo, mar shampla don mhúinteoir ranga / phríomhoide le súil a choinneáil ar thinreamh, le dul chun cinn an dalta a thaispeáint tríd an mbunscoil, le planáil don fhoireann - múinteoirí ranga / cúntóirí seomra ranga, le go mbeidh cigirí ón Roinn Oideachais agus Oifigígh Thinrimh Scoile in ann scrúdaithe a dhéanamh orthu, le líon na ndaltaí a bheidh ag dul ar aghaidh chuig scoileanna dara leibhéil a chomhaireamh agus ar mhaithe le cúrsaí staire...
- Mínigh do na páistí go bhfuil an rialtas, ar an gcaoi chéanna a dhéanann an múinteoir an rolla a ghlaoh gach maidin, ag déanamh comhairimh oifigiúil de dhaonra na tíre. DAONÁIREAMH a thugtar ar an 'gcomhaireamh oifigiúil' seo. An Phríomh-Oifig Staidrimh a bheidh á dhéanamh.



Gníomhaíocht don Rang Iomlán

- Tabhair deis do na páistí an t-eolas agus taithí atá acu ar an daonáireamh a roinnt. D'fhéadfaí úsáid a bhaint as teimpléad ECF (eolas, ceist, foghlaim) anseo leis an méad atá ar eolas cheana ag na páistí a bhreacadh síos agus céard iad na rudaí gur mhaith leo foghlaim faoin daonáireamh [Acmhainn 1.1].
- Déan taifead ar na príomhcheisteanna go bhféadfadh páistí a úsáid le tuilleadh a fhoghlaim faoin daonáireamh [Acmhainn 1.2].

E	C	F
Sa cholún seo déanann na páistí taifead de na rudaí atá ar eolas cheana acu faoin daonáireamh.	Anseo déanann páistí taifead ar na rudaí gur mhaith leo foghlaim faoin daonáireamh. Beidh na príomhcheisteanna seo a leanas ina gcúnamh le díriú ar an bhfoghlaim: Céard é daonáireamh? Cén fáth a bhíonn daonáireamh ann? Cén uair atá an chéad daonáireamh eile? Cé atá páirteacha sa dhaonáireamh? Cá mbíonn an daonáireamh ann? Cén chaoi a gcuirtear i gcrích an daonáireamh?	



Daonáireamh 2016

- Tabhair cóip do na páistí den scéal ‘Daithí agus Daonáireamh 2016’ [Acmhainn 1.3].
D’fhéadfaí an scéal a léamh amach ós ard freisin do na páistí nó a chur ar thaispeáint ar an gclár bán idirghníomhach don léamh roinnte.
- Stop ar feadh soicind ag na pointí réamhaisnéise atá marcáilte leis an siombal 😊 sa scéal agus spreag na páistí le buille faoi thuairim a thabhairt, mar shampla
 - 😊 Cé a cheapann tú a bhuail cnag ar an doras?
 - 😊 Cén t-eolas a cheapann tú a bhí ag Daithí don teaghlach?
 - 😊 Cén chaoi a gcheapann tú go mbeidh gach duine in Éirinn comhairthe?
 - 😊 Céard a dhéanfaidh Daithí leis na foirmeacha nuair a bhaileoidh sé iad?
- Nuair atá cleachtadh ag na páistí ar an scéal, d’fhéadfaí na ceistanna seo a leanas a chur orthu:

- 📖 Céard é teideal an scéil?
- 📖 An teideal feiliúnach é? Cén fáth gurb ea / nach ea?
- 📖 Cé hiad na carachtair sa scéal?
- 📖 Cá bhfuil an scéal suite?
- 📖 Cén mhí atá ann?
- 📖 Cén t-am den lá a cheapann tú a bhí ann? Cén chaoi a bhfuil a fhios agat?
- 📖 Cé a bhuail ar an doras?
- 📖 Cé dó a bhí Daithí ag obair?
- 📖 Cén teideal atá ar a ról / a phost?
- 📖 Céard do a sheasann na litreacha POS?
- 📖 Dúirt Daithí go raibh eolas tábhachtach aige don teaghlach. Céard é an t-eolas seo?
- 📖 Cén dáta a bheidh an daonáireamh ann?
- 📖 Cén chaoi ar mhínigh Daithí céard é an daonáireamh?
- 📖 Céard a thug Daithí don Uasal Ó Ceallaigh?
- 📖 Céard atá le déanamh ag an teaghlach leis an bhfoirm dhaonáirimh?
- 📖 An mbeidh aon duine de chomharsana teaghlach Uí Cheallaigh ag fáil foirm dhaonáirimh? Cén chaoi a bhfuil a fhios agat?
- 📖 Cén uair a bhaileófar foirm an daonáirimh?
- 📖 Céard a tharlóidh do fhoirm an daonáirimh nuair atá sí bailithe?



- Tríd scéal, caint agus díospóireacht beidh tuiscint faighte ag na páistí maidir leis an daonáireamh ag bunleibhéal. Tá sé in am anois a gcuid smaointe a thairgead. Is féidir leis na páistí oibriú i mbeirteanna ar chártaí ceistanna agus freagraí [Acmhainn 1.4], agus a gcuid freagraí ar na príomhcheistanna a thabhairt – Cén rud? Cén duine? Cén áit? Cén uair? Cén fáth?
- Nó eile, tabhair cártaí Ceistanna agus Freagraí do na páistí atá líonta amach cheana [Acmhainn 1.5]. Léigh iad seo leis na páistí agus cuir suas sa seomra ranga iad in áit taispeántais don daonáireamh.
- D’fhéadfaí an t-eolas seo a leanas maidir leis an Daonáireamh a roinnt leis na páistí. Bain úsáid as ceistanna liteartha agus meastóireachta le cúnamh a thabhairt smaointe a dhaingniú.

Céard é Daonáireamh?

Áireamh oifigiúil de dhaonra na tíre é daonáireamh. Tugtar daonáireamh ar an gcineál áireamh seo agus tá sé á dhéanamh ón gcianaois.

Cén fáth a theastódh ó dhaoine an t-eolas seo a bheith acu?

Céard is brí leis an bhfocal Béarla 'Census'?

Tagann an focal Béarla 'Census' ón bhfocal laide *censere*, a chiallaíonn "measúnú nó cáin".

Bhíodh oifigigh rialtais ag cur liosta le chéile de na daoine agus dá maoin. Cuireadh luach ar an maoin ionas go bhféadfaí cáin a bhailiú. Sa Bhéarla 'censors' a tugadh ar na hoifigigh rialtais seo.

Cén fáth go dteastaíonn ó rialtais cáin a ghearradh ar dhaoine? Céard a cheapann tú a ndéanfaidh siad leis an airgead? An mbeadh tír in ann déanamh gan cánacha?

Stair an Daonáirimh

Fáth eile a bhí ann le mioneolas a bhailiú faoin daonra le daoine a aimsiú don tseirbhís mhíleata.

An gcaithfidh daoine dul san arm sa tír seo? Cén fáth ar theastaigh ó cheannairí sa sean am airm mhóra a bheith acu?

Thóg na Rómánaigh na daonáirimh ba iomlána sa domhan arsa (ag tosú sna blianta 500 roimh Chríost).

Cén fáth a mbíonn daonáireamh ann?

Tá daonáireamh ann le fíricí agus figiúirí (staitisticí) a chur ar fáil a theastaíonn ón rialtas le cúinsí eacnamaíocha agus sóisialta na tíre a scrúdú.

Sa lá atá inniu ann, tógann beagnach gach tír daonáireamh oifigiúil gach cúig nó deich mbliana. Tá an daonáireamh an-tábhachtach mar tugann sé pictiúr cuimsitheach den tír agus is é an fhoinsé is mó eolais maidir leis an tír. Tá an t-eolas a sholáthraíonn an daonáireamh an-luachmhar mar soláthraíonn sé bunús don dea-rialtas.

Cén cineál rudaí a theastaíonn ó rialtas a bheith ar eolas aige maidir lena shaoránaigh?

Spreag na páistí le ceannteidil leathana a chumadh, mar shampla postanna, cé mhéad a shaothraíonn daoine, cá bhfuil cónaí ar dhaoine

Is féidir leis an rialtas déanamh amach:

- an bhfuil an daonra ag méadú/ag ísliú
- aon athruithe i gcothromaíocht aoise agus gnéis
- líon na ndaoine ina gcónaí i gceantair tuaithe / uirbeacha (faoin tuath/i mbailte)
- líon na ndaoine sa bhun/meánscoil agus ag oideachas tríú leibhéal
- athruithe i ngairmeacha beatha agus líon na ndaoine atá fostaithe
- modhanna iompair atá in úsáid...

ar an gcaoi chéanna go mbailíonn an príomhoide eolas sa scoil, bailíonn an rialtas freisin eolas le cúnamh a thabhairt treochtaí sa todhchaí a mheas agus don phleanáil ag leibhéil difriúla - náisiúnta, áitiúil, poiblí agus príobháideach.

Seisiún Díospóireachta

Sa seisiún seo beidh na páistí ag obair lena chéile le páirteanna den cheacht a phlé:

- Oibríonn na páistí i mbeirteanna – ag tógáil seala an duine le ceisteanna a bhaineann leis an daonáireamh a chur agus a fhreagairt. Is féidir le leideanna ceiste ag úsáid Cártaí Príomhcheisteanna [Acmhainn 1.2] cúnadh a thabhairt do na páistí le ceisteanna a chruthú.
- Cuir Daithí Daonáirimh in aithne uair amháin eile agus cuir ceist ar na páistí cén fáth ar thug sé cuairt ar an seomra ranga inniu i.e. le múineadh do na páistí faoin Daonáireamh.
- Céard iad na príomhcheisteanna a cuireadh ar Dhaithí Daonáirimh maidir leis an Daonáireamh?

Cén rud ? Cén duine? Cén áit? Cén uair? Cén fáth? Cén chaoi?

- Téigh siar ar gach ceist uair amháin eile ag iarraidh ar na páistí cén freagra a bhí ag Daithí Daonáirimh ar gach ceann acu.
- Síniú méar i dtreo gach cárta ceiste agus freagra atá le feiceáil agus léigh leis na páistí iad.
- Gníomhaíocht gur féidir na páistí sásamh a bhaint as é Daithí a chur sa ‘Suíochán Te’ ~ ligeann páiste amháin air/uirthi féin gurb é/í Daithí Daonáirimh agus freagraíonn sé/sí na ceisteanna a chuireann na páistí eile.

Obair bhreise

- Cuir le chéile cur i láthair simplí bunaithe ar na príomhcheisteanna daonáirimh ar chairt, i leabhar gearrthóg nó ag baint úsáide as bogábhair ríomhaire.
- Tabhair cuairt ar www.censusatschool.ie agus comhlánaigh an ceistiúchán ‘Daonáireamh ar Scoil’ ar líne agus bí mar chuid de shonraí na suirbhéireachta.
- Cuardaigh staitisticí ar www.cso.ie/census.

Naisc Bhaile/scoile

- Déan plé ar Dhaonáireamh 2016 sa bhaile agus iarr ar bhaill an teaghlaigh smaoineamh siar ar an méid is cuimhin leo ó Dhaonáireamh 2011 [Acmhainn 1.7].
- Spreag na páistí le príomhcheisteanna Daithí a chur sa bhaile.
- Tabhair cuairt ar www.census.ie le tuilleadh a fhoghlaim faoi Dhaonáireamh 2016.
- Plé na ceisteanna a bhfuil súil agat feiceáil ar fhoirm an Daonáirimh [Acmhainn 1.8].



ECF - Daonáireamh



E

C


F



Daonáireamh 2016

Daithí agus Daonáireamh

Trathnóna báistí i mí an Mhárta a bhí ann. Bhí Bean Uí Cheallaigh gnóthach ag tabhairt cúnaimh do na páistí lena n-obair bhaile. Sa chistin bhí fear an tí ag ullmhú an dinnéir don chlann. Bhual duine go láidir ar dhoras an tí. 😊



D'oscail Bean Uí Cheallaigh an doras.

"Dia dhuit", a dúirt fear go cairdiúil. "Is mise Daithí Daonáirimh. Táim ag obair don rialtas sa Phríomh-Oifig Staidrimh (POS). Tá eolas tábhachtach agam duit". 😊

"Tar isteach a dhuine uasail", a d'fhreagair Bean Uí Cheallaigh. Chuaigh Daithí Daonáirimh isteach sa teach agus shuígh sé síos. Thug an tUasal Ó Ceallaigh cúpán tae don fhear. Bhailigh an clann timpeall le n-éisteacht leis an méad a bhí le rá ag Daithí.

"Cén t-eolas atá agat dúinn, a Dhaithí Daonáirimh?" arsa an tUasal Ó Ceallaigh.



"Is lá an-tábhachtach é Dé Domhnaigh, 24 Aibreán i mbliana mar sin é an lá a bheidh Daonáireamh náisiúnta á thógáil", a d'inis Daithí dóibh. "Céard é Daonáireamh?" arsa Mícheál Óg.

"Bhuel, a bhuachaill, is comhaireamh é Daonáireamh de dhaonra na tíre - déanfar gach duine a chónaíonn in Éirinn a chomhaireamh ar an lá sin", a mhínigh Daithí. "IONTACH! Sin go leor daoine", a bheic Mícheál.

Daonáireamh
2016 AIBREÁN
24
GLAC DO PHÁIRT



"An mbeidh ar gach duine seasamh sa líne le bheith comhairthe ar nós a dhéanann muid ar scoil?" a d'fhiafraigh Áine. 😊

"Ó ní bheidh, a stóirín! Bheadh sé sin i bhfad ró-dheacair. Tá foirm Dhaonáirimh anseo agam do gach teaghlach. Tá liosta ceisteanna ar an bhfoirm atá le freagairt ar an Domhnach, 24 Aibreán", a d'fhreagair Daithí Daonáirimh.

"Beidh spraoi againn. Beidh muid in ann breathnú ar Mham agus Daid ag déanamh a gcuid obair bhaile !" a dúirt Áine agus Mícheál agus iad ag gáire.

"Sea, cinnte. Beidh mise ar ais cúpla lá ina dhiaidh sin leis an bhfoirm chomhlánaithe a bhailiú agus leis an obair bhaile a cheartú" a dúirt Daithí agus é ag gáire. "Tá sé tábhachtach gach ceist a fhreagairt go han-chúramach ar fad agus an fhoirm Dhaonáirimh seo a choinneáil in áit sábhálta".



"Céard a dhéanfaidh tú leis na foirmeacha nuair a bheidh siad bailithe agat?" a d'fhiafraigh Peadar. ☺

"Beidh na foirmeacha atá bailithe ar fud na hÉireann curtha chuig oifig mhór agus déanfar na freagraí ar fad a sheiceáil agus a chomhaireamh. Déanfar graif agus léaráidí ansin leis na torthaí a thaispeáint".



"Obair mhór í sin", arsa Mícheál.


"Is ea. Ach is fiú ar fad é. Baintear úsáid as an eolas bailithe le cúnamh a thabhairt don rialtas toadhchá níos fearr a phleanáil dúinn ar fad. Is féidir linn pleanáil do scoileanna, ospidéal, córais iompair, don tsláinte agus go leor rudaí eile má tá dóthain eolais againn", a mhínigh Daithí. "Anois, is fearr dom imeacht mar tá tithe eile agam le cuairt a thabhairt orthu. Go raibh maith agaibh as an tae. Beidh mé ar ais an mhí seo chugainn leis an bhfoirm dhaonáirimh a bhailiú".



Oíche Dé Domhnaigh, 24 Aibreán bhailigh clann Uí Cheallaigh timpeall ar an mbord le foirm an daonáirimh a chomhlánú, foirm a bhí coinnithe slán sábháilte acu. Léigh an tUasal Ó Ceallaigh na ceisteanna amach ós ard agus thug gach duine cúnamh len iad a fhreagairt. Scríobh Bean Uí Cheallaigh na freagraí ar fhoirm an daonáirimh. Tháinig Daithí Daonáirimh ar ais an tseachtain dár gcinn chun an fhoirm a bhailiú agus í a thabhairt chuig an bpríomh-oifig staidrimh le seiceáil agus comhaireamh a dhéanamh uirthi leis na foirmeacha ar fad eile ó thimpeall na tíre.



Céard é an Daonáireamh?



Cá dtógtar an Daonáireamh?



Cé a thógann Daonáireamh?



An Phríomh-Oifig Staidrimh
Central Statistics Office


Cén uair a bhíonn Daonáireamh ann?



Cén fáth a bhíonn Daonáireamh ann?



Céard é Daonáireamh?



Comhaireamh
oifigiúil de líon na
ndaoine sa tír é
Daonáireamh.



Cá dtógtar an Daonáireamh?

Beidh foirm Dhaonáirimh



ag gach teaghlach in
Éirinn le comhlánú
Lá an Daonáirimh.



Cé a thógann Daonáireamh?

Foireann daonáirimh (POS) a dháileann agus a bhailíonn na foirmeacha daonáirimh. Déantar na freagraí ar na foirmeacha sin a sheiceáil agus a chomhaireamh.



Cén uair a bhíonn Daonáireamh ann?

Bíonn daonáireamh ann in Éirinn gach cúig bliana. I mbliana is é Dé Domhnaigh, 24 Aibreán, Lá an Daonáirimh.




Cén fáth a bhíonn Daonáireamh ann?

Bíonn Daonáireamh ann le
cúnamh a thabhairt do rialtas na
hÉireann cinneadh tábhachtach
a thógáil agus pleanáil don
todhchaí.






Acmhainn 1.7



census
2011 APRIL
10
MAKE YOUR MARK

Céard is cuimhin leat?

Ceacht a 1: Rang a Cúig / Sé



Acmhainn 1.8



Ceacht a 1: Rang a Cúig / Sé

Céard iad na ceisteanna a bhíonn go ginearálta ar fhoirm dhaonáirimh?